

TAITASNYI **Paul gv Siti Jinam** **Mintamchonam**

Taitus jentail nyi go kristan lo aalaku Paulnyi kudungkua ribam ajin gobv okv ninyigv missionary aralo ridur minggv kunv bv rito. *Paul gv sitiv Taitusnyi lvkto* kret ara lokv ninyigv nyipayapa riduryanv gobv siti go jiging lvkto, gvrja lo rinampanam am japriaparianv bv ripikula dookunvgo. Siti si rijipaji kogv anyik jvngv aomgo lvkdvr linjito.

Atuake bv Taitas gvrja rigvdogv jinv vdwgv nvgwngnv rijidoji nvnga mindw linji toku, asarjvbv Kretan nyi vdwgv alvmabv rinamdonama minji toku. Minsen sinvbv minam si, Taitas gvrja lokv nyipam dvdv ngam oguaingbv tamsarkinu svngvdw um minsar la ritoku, nyikum, ongu bv rikunv (yvvdw, mvngdw laku, mvvgagaado solo bv rinv um tamsar la ridudw um mindu), nyipayapa okv nyira mvnwng nga minji toku. Minyung gaam si, taitasnyi kristan rinamdaknam lo mindin jilaka vla siti jinv vv jitoku, asarjvbv minji namsi himpu nam lvgabv okv ajinaram bv rinam lvgabv, okv kaanwng mabv rinam sum kayu kunam lvgabv, larmisinam sum kayu kunam lvgabv, okv gvrja aralo taknyitagam gobv rimanam lvgabv tamsarkinu la ritokv vla jito.

Arwng lokv darlinnam

Mintamchonam (1:1-4)

Gvrja lo nyigam (1:5-16)

Gvrja aralo nyipam dvdvgv kudungkua (2:1-15)

Mindinminbianam okv gamrwnam (3:1-11)
Minyungminya (3:12-15)

¹ Paul lokv, Pwknvyarnv gv pakbu akobv okv Jisu kristo gv Apostol akobv rinv ngv.

Ngo darlinkunam okv Pwknvyarnv gv darlinkunam mvngjwngnv vdwa rigur yadubv vngmu kunamv okv bunua dormo ngam jvjvrungbv tamsar la rigv dukubv.

² Turbwngjiku lvgabv mvngtin dubv mvlinrelin jito. Pwknvyarnv mvvmanv, kvvlo atuake lokv ngv soogv turnam am ngonua milvpvkunamv.

³ Okv tarwkbak dw loku ninyigv doin lo hv kaatam toku. Sum nga ritoka vla parlwk toku, okv ngooka ngonugv ringnvbaanv Pwknvyarnv gv mingkulo ngo japgo kartoku. ⁴ Taitusnyi ngo siti go lvkto, ngonugv mvngjwng lvyinakinv ngokv jvjvrungnv kuunyilo.

Pwknvyarnv Abu gv okv ringnvbaanv Ahtu Jisu kristo gv Anyuaya okv sarsopoyo nonu gvlo jilwk yilaka.

Kret lo Taitas gv kudungkua.

⁵ Nam ngo Kret mooku so doomu gvrinv, ogulvgavbolo vjvgv so risv rijinam mvnwng gv rilakv vnam ridung dunv sum riyapaya dubv okv banggu mvnwng gv gvrja lo rigvdogv nvlo laalwk yadobv mvngla vkvlgabv so nam doomudunv. Ngoogv minsarpvnam sum mvnggap pvvlaka:

⁶ Rigvdogv nvgobv ribolo oguguka rimur kaama rungnv gobv rirungdunv; vv nywng akin

mvngchik nvgobv rirungtoka, * okv vkvgv umvuu ngv mvngjwng nvgobv rirungtoka okv alvmanv yalungyachung amin gvnv gobv rirungmabvka okv tvvma nvgo bvka rirung mabvka. ⁷Vkvlvgabv Pwknvyarnv gv gvrja kudungkua nga rigvdogvnnv um kaayadubv klu lokv jilwk dunv, hv rimur nam kaama rungduv rirungtoka. Hv vdwloka kaimvngsu vmalo biokyibiokcha nvgobv, vmalo tvngkium nvgobv, vmalo tvngngur nvgobv vmalo, morko lvgabv nyilin nvgobv rimare. ⁸Hv nyen chigamrainv nvgobv okv ogugonv alvpvdw um paknv gobv rirungtoka. Hv saktv nvbv, alv nvbv, darwk nvbv, okv kachingkamu sunv gobv ritoka. ⁹Hv mvngjwng nyola dubv okv oogv doin nga vngdwngbv gakbwngla ritoka okv vv arinjvnnv gaambv ridu. Vbvrila vkvnnv lamtv lo jvjvnnv tamsarnam lokv hv kvvbia mintvmiru jila dubv okv yvvdw um alvmabv mindudw umka alvmanam am kaadin la kaatam rungtoka.

¹⁰Ogulvgavbolo ho hoka achialvgo, asarjv bv bunugv kvbi nyiposojo vdwa kupnv okv turmilarmi sinv, judaism lokv aanv vdwv rito.

¹¹Bunugv mindunam sum mintor dukubv rirungdu, ogulvgavbolo bunu rima tvsv yanga rila bunugv tamsarnam lokv vpin dvdv nga mvngru mola riduku, okv hinyinghiru dubv rinam aka morkoain lvgabv bv rinya duku. ¹²⁻¹³Vv ninyi atubongv kretan go, bunugv atubogv aralo nyijwk akobv rinvgv, vv soogv jvjvnnv gaam sum mindu, “Kretan vdwv rukimvki la ridu, alvmanv svnwngsvmin bv ridu, okv svpelakre

* **1:6** Nywng akin mvngchik nvgobv rirungdunv; Vmalo Akin mvngchikgo nyimv laamwng tvka.

la dwdwkdvyit nvbvka ridu.” So lvgabv no dinchirungbv bunua yamtoka, vkvlvgavbolo bunu gvlo mvngjwng ngv vngdwngnam lvgabv. ¹⁴ Okv kvvlogv jius vdwgv higuhiarak okv nyia gamki lokv aanv oogv jvjv nga laarwk simu manv nyi gobv ridu. ¹⁵ Bunu atubongv yvvdw darwk dunv ogumvvnwng vka darwk dunv; vbvritola bunu yvvdw alvmadunv okv mvngjwng madunv oguguka vka darwk madunv, ogulvgavbolo bunugv mongramara okv mvngdw nvnv ngv darwk madu. ¹⁶ Bunu vdww mindu bunu Pwknvyarnvnyi chinpvnv vdu, vbvrijvka bunugv gwngdungridung lo rijwkmadu. Bunu kaanwng manamv okv tvvnwng manamv dodu, ogumvvnwng alvnvngv ugu vdww um riyin manv ngv.

2

Alvvv tamsarnam

¹ Vbvritola alvvv arwngrungbv mvngjwk dadubv um nonu tamsar rungtoka. ² Nyimin nvgobv, tvvba nvgobv, okv saktv nvgobv; Bunugv mvngjwng lo alv nvgobv, Paknam gobv, okv himvlaknv gobv nyikam vdwa minsar jirung toka. ³ Oogv apiabv nyimv ungu vdwwaka oogv darwkbv rinvdaknv nyimvmvnga gobv ridubv tamsar la rirung tvka. Bunu minyingmiru kuma nvgobv rirung dukubv vmalo opogv nyira bv rima rungdu kubv. Alv nvngv ogugudw um bunu vdwa tamsar rungtoka. ⁴ Soogv minsar nam lokv mvgagaado bormvyanv vdww bunugv nyilu okv umvuu nga pakdukubv, ⁵ Saktung sunv gobv, okv darwk nvgobv okv oogv ninyigv atubogv nyilulo

tulwksula alvnnv naamnywng gobv rila dukubv, vkvlgavbolo Pwknvyarnv lokv aanv doin am yvvka alvmabv mimare.

⁶ Hoogv apia bv nyipayapa vdwaka saktung sunv gobv ritokv vla mintvmiru jilaka. ⁷ Ogumvnnwng dvdvlo no atubongv alvnnv kaaring namgobv ritoka. Hindumsula okv noogv tamsarkinu nama mvnggap chirvtvka. ⁸ Miyakaya madubv alvbv arwngrungbv gamchar sum minv vngnv tvlaka, vkvlgavbolo nonugv nyimak kv nonugv lvkwnglo oguguka alvmanv minsngo kaamabv hinying paasu riku.

⁹ Bunu nyira vdww atugvlo tulwk sulaka okv bunua ogumvnnwng nga mvngpu motoka. Bunua minkurla bunua mirwk simu mabvka ¹⁰ vbvmajeka bunu gvlo dvcho goka chomuyoka. Vbvmayabv, bunu vdwa kaidwkibv alv nvbv okv jwkjwkvrwk rungnvbv kaatam dubv bunua rimolaka, vbvrila bunu vdwgv rinam dvdvlo ngonugv ringnvbaanv Pwknvyarnnv gv lvkwnglo tamsarkinu jila rinamv hartvnam paariku.

¹¹ Holvgabv Pwknvyarnv ninyigv anyuaya nga nyi mvnnwng gv ringlinbaalin lvgabv kaatam toku. ¹² Oogv anyuayanam vv ngonua vbv tamsardu, pwknvyarnv kaamabv rinamdaknam, okv nyiamooku hvriokpajaknam sum kayu tokuka, okv atubongv saktung sunam, tarwkbaknam, okv darwknvbv nyiamooku so ritoka, ¹³ ngonugv mvngtin sinam ngonugv boktalwkdw alua kaayadoya dunv si, vdwlo ngonugv kairungnv

Pwknvyarnv okv ringnvbaanv Jisu kristo* gv yunglit ngv kaatam looriku. ¹⁴ Hv atubongv ngonu lvgabv jilu sutoku, alvmanv dvdv lokv ringlinto okv oogv ninyi mvngchik gvbv dookudaku nvnga okv alvbv rinwng mola ngonua darwknv nyi gobv mvtoku.

¹⁵ Svkvnv sum vbv tamsar tvka, akomaring bv tujupkunam rinvnv lokv mintvmiru jila okv yamla nonugv tvvrianv vdwa ritoka. Vbvribolo yvvka nam mvngyakaya kumareku.

3

Kristan ridung ngv

¹ Nonugv nyi vdwa mindwmiying jila rigvdogvnv okv tujupkunam gv aralo tulwksula, bunua mingku bv vngmu tvka, okv alvnv lamtv dvdvlo ridubv mvngpvripv motoka. ² Yvnyika alvmanv gaam mima bvka vla bunua minji tvka, vbvritola sarsopoyo yabv okv ajin yabv jimi sitoka, okv kaidwkibv nyi mvnwng gv kaakulo damdvbv kaatam dubv mvngtoka.

³ Holvgabv alu gulo ngonuka lvko atubongv nyiposooyo, tvvmato, okv rigakrirakto. Ngonu vdww heriokpajok gv pakbu bv rila okv nvgwng mvnwng gv rinwng nama riminto. Ngonugv turnama ngonu kvsar sarnam okv alvmabv kavtav nyato; Ngonua kvvbiv kaanwng mato okv ngonuka bunua kaanwng kalam mato. ⁴ Vbvritola vdwwlo ngonugv ringnvbaanv Pwknvyarnv gv

* **2:13** ngonugv kairungv Pwknvyarnv okv ringnvbaanv Jisu kristo; Vmalo kairungv Pwknvyarnv okv ngonugv ringnvbaanv Jisu Kristo. **2:14** Miri 130:8; Mog 19:5; Det 4:20; 7:6; 14:2; 1Pit 2:9

ayanam okv paknam am kaatam kubvdw, ⁵ hv ngonua ringlin toku. Si ngonugv atubongv rilakdolak nam lokv rimato, vbvritola vv ninyigv aya lokv si ngonua ringlin pvkunv, oogv Darwknv Dow lokv, ngonua anw bv kuu bvngdw motoku okv anw bv ngonua harkak toku. ⁶ Ngonugv ringnvbaanv Jisu kristo lokv Darwknv Dow am achialv kaigo Pwknvyarnv ngonu gvlo pwlwk toku, ⁷ vkvlvgabv ninyigv anyuaya lokv ngonu Pwknvyarnv gv lvkobv tarwkbak bv doodu okv turbwng jiku lo aadu kubv mvngtin nam lvgabv rila dukunv. ⁸ Si jvjvrungnv go mindungdu. Ngo nonua svkvnv sum asarjvbv rijisvgo mvngdu, vkvlvgavbolo Pwknvyarnvnyi mvngjwngnv vdww bunugv ridw lo lvkobv alvnv ridunglo rilwk yala riku, alvyachok nvbv okv mvnwng gv lvgabv arinyachoknv gobv rireku. ⁹ Vbvritola nyiposofo bv larmisinam, abuapa asukoyobv nvdw kiinam, yalung dunam, okv Pvbv lvkwnglo yalung dunam am kayu tvkuka. Vkvnv vv bunu arinkaamanv okv alvmanv ngv. ¹⁰ Taknyitagam gobv rimu tvdunv sum maanyingkinyingka lvnyi go gamrw pvvtoka okv um oguguka lvko mintinmiyin kuyoka. ¹¹ Vkvnv nyi am no chindu vv alvmanv vla, okv bunugv rimur am bunu rigak parung dunv vla kaachin modu.

Minyungminya bv minsarkunam

¹² Vdwlo ngo Artemas vmalo Takikus nyi no gvlo vngmu ridw, noogv lvgvlvma lo nikopolis lo ngo gvlo aamu laka, ogulvgavbolo ngo dvra

anying nga doodubv vla mvngdunv. ¹³ Zenas loyer okv Apollos bunugv mooying vngrapda okv bunugv gvsv nga kaagv rila dinchi dudw nonugv lvgvlvma bv mvdur laka. ¹⁴ Ngonugv nyi vdwv alvbv ridubv moma nga jilwkla tvvsar sidubv rirungdu, dinchinam am mingkulo jila nam lv-gabv; Bunu rinam lo arin kaama kolo riku marung reku.

¹⁵ Ngam yvvdw dooming gvnv mvnwng ngv nonua kumrwksinam am pao jidu. Ngonugv kum-rwksinam am mvngjwng lo doonv ngonugv ajin vdwgvlo jilwk dunv.

Pwknvyarnv gv anyuaya ngv nonu mvnwng gv lvkobv doolwk yilaka.

ANWNV GAMLV
Tagin first Bible translation based on TEV (Good News)
copyright © 2018 The Word for the World International

Language: (Tagin)

Contributor: The Word for the World International

The New Testament in Tagin
Published as

ANWNV GAMLV

The Word for the World International

This translation is made available to you under the terms of the Creative Commons Attribution license 4.0.

You may share and redistribute this Bible translation or extracts from it in any format, provided that:

You include the above copyright and source information.

If you make any changes to the text, you must indicate that you did so in a way that makes it clear that the original licensor is not necessarily endorsing your changes.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

Note that in addition to the rules above, revising and adapting God's Word involves a great responsibility to be true to God's Word. See Revelation 22:18-19.

2023-08-23

PDF generated using Haiola and XeLaTeX on 13 Jul 2024 from source files dated 15 Apr 2023

65e96bca-33d6-5dc6-a8ee-da485ecfb7ed